

臨縣志

劬周署檢

160.183

41

部三4

83

錄第五

名宦

鄉賢

列女

臨縣志卷十八

試署臨縣知事古黔胡宗虞監脩

山西大學校文科學長晉城郭象升審定

名宦錄第一

循吏有傳昉於馬遷志既不敢同史則亦不必沿其例懼僭也臨在漢唐而上宰治茲土者姓字無徵金元以來州尹縣令學師縣尉代有循良雖其時報政稱最遺愛難忘閱世云遙流風頓歇不有志以記之得母邈而難徵歟明末清初祀名宦者十二人謹依舊志悉爲編錄其自康雍以降迄乎同光二百年間又得良吏若而人摩挲殘碑詢訪故老不啻歌來暮而繫去思略考之後因先著錄名宦焉

臨縣志

卷十八錄名宦

元

馬麟至正二十六年當兵革之餘臨民蕩析離居公以諸軍奧魯知臨州開誠率物利用宜民創造房屋民免土崩之患振興學校士知科甲之榮政績相傳至今弗諼

明

張雲平谷縣舉人景泰四年蒞臨百廢俱興六事兼舉公庭息訟學校聿興廉潔無私政聲卓著吏畏其威民懷其德陞授濮州知州大同府知府臨民至今猶頌之

汪清固始縣人景泰間由進士授監察御史嚴毅剛正因忤權貴天順元年左遷臨縣知縣勸農桑立學校興水利減徭役除強梗旌善良凡有便於民者皆以次修舉後丁外艱去任士民送

之郊外涕泣言曰安得汪父母長撫我民也

高峻棠邑縣舉人明宏治四年知臨縣廉以持己嚴以絕私巡阡陌教農桑省里甲均徭役興學以造人材築隄以捍水患吏畏民懷至今稱之

李承嗣長安縣舉人正德十四年任臨縣知縣秉性節儉廉以蒞民歷官六載終始如一外和內剛安良除莠綽有古循吏風後擢陞鳳陽府通判霍州知州

任大伯華陰縣舉人嘉靖三十二年到任慎以持己仁以愛民勤以立政未幾改調士民感戴爲志德政記立去思碑

脫鎬新河縣舉人嘉靖三十七年蒞臨勤敏慈愛實政及民歷任四年繕城垣修河隄賑凶荒編保甲善政不勝枚舉又遷建學

臨縣志

卷十八 錄名宦

二

宮俾臨地文明進化尤爲特舉有修學宮碑記

見營建考

賀定國河南獲嘉人嘉靖四十四年由舉人知縣事剛方持躬清白風世治邑如家愛民如子後陞徽州知州有德政思慕碑

陳舜道字希孟直隸新安人萬歷六年由貢監知臨縣事法度嚴明判斷敏決縣城東逼湫水衝決之患無歲無之前雖築隄砌石開渠引流終難獲永久之利公親詣踏勘度地相形計非用大石築基貫以鐵鈕厚其址高其隄不克障此狂瀾因規畫一切時日之限用度之數靡不計算周悉且夙夜程督始終無倦甫期月而隄成再逾歲而功就從此城無剝落之虞民獲安堵之慶邑人立德政碑於申明亭以誌不朽

張問行直隸邢臺人萬歷十八年由舉人蒞臨平易近人端方持

已在任五載諸多建置有功民社尋陞濟南府通判
諸葛昇浙江壽昌人萬曆四十五年由選貢知縣事風格清奇文
詞俊逸惠政及民尤不勝殫述其最著者葺西城興水利俱有
碑記可徵士民建生祠祀之

魏錫祚陝西固原人由貢監知縣事當崇禎六年臨城新復綠林
四擾民若驚鴻公以身捍衛五載之間席不暇暖後致政告歸
士民挽轅臥轍自城及鄉連絡不絕因爲建立生祠有去思詩
詞至今傳誦

以上元明時名宦十二人康熙二十五年知縣莫友仁彙請
崇祀

聶聰曹縣人成化元年任教諭天性剛果潛心理學嚴以訓士放

臨縣志

卷十八 錄名宦

三

蕩必儆正直是與士風爲之一振

劉璿灤州人正德四年以知縣左遷教職廉靜寡欲以德化人崇
尚禮義不計束脩繼陞遼東教授

王榮平順縣人萬曆十八年任訓導師範端嚴教規整肅勤課以
督諸生蠲俸以恤寒士後陞大寧都司教授

侯有功遼州人天啓三年任訓導謙恭持己和厚接人道貌古心
儒言法行綽有濂洛之風

清

張耀祖滿洲生員順治初蒞臨五年值姜瓖之變登城守禦賊大
至圍城攻之急公曰此吾效命之秋也力守以死詔贈按察使
僉事彙祀山西忠烈祠廕一子

王之佐浙江山陰人順治二年任縣尉姜瓖之變孤城失守知縣張耀祖死難公忠憤激烈思擒渠魁以圖恢復率領民兵趨上趙寨後賊黨犯寨拒戰旬餘卒以力不能支爲賊所執義不屈罵賊以死事後賜恤彙祀山西忠烈祠廕一子以知縣用李國維滿洲人順治七年知縣事廉靜愛民及去士民泣送於途立去思碑

孫世蓋字丹台興縣人順治八年以明經任臨縣訓導勤於課士持身接物足爲楷式後陞垣曲教諭繼擢江西崇仁縣知縣到處政教有聲垂老挂冠歸田日以詩酒自娛傾囊以濟貧交文定公嘉淦其文孫也

胡士廉嘉興縣人順治十三年由貢監知臨縣廉靜愛民以拂上

臨縣志

卷十八 錄名宦

四

官意罷歸民泣送之

王嘉言天城衛人順治十三年任訓導持躬端方與物長厚有古篤行君子風後遷嵐縣訓導陞長治縣教諭所在德教足爲後學儀型

莊摺江南武進人康熙十四年以進士知臨縣事明末清初二十年間闖焰姜氛連遭劫運公下車伊始編查戶口田荒丁稀撫此災黎方救拯之不遑又值奉飭增賦先爲民抗請然後酌加民不爲苦廉得東白都凋敝狀以四甲丁輸十甲賦補瘡剝肉勢必難支因出俸金置水田三十畝有奇計畝四金底秋地租多寡若干視賠糧上中下爲差等以分給各賠戶並刻石示後他如增築城樓以備不虞亦先出俸金倣劉晏理財必用士人

之意屬諸子弟董治之遂率義士高標等朝夕拮据庀材飭匠計日課工又恐糜費鎔銖將各匠口食輪流犒勞之於是費省功倍不日告成復於文昌舊址建臺閣以壯觀瞻在臨十年凡建置更革事事皆措自己手擢升騰越州行取戶部員外郎莫友仁浙江會稽人康熙二十三年以拔貢知臨縣事乘莊公勵精圖治之後力求進化一切善政迭次具舉凡嚴保甲清道路築河堤葺學宮創建義學廣置義塚贍獄囚糧以矜有罪修養濟院以恤無告在任十餘年多所建置捐俸不足濟以家資見縣志殘闕延諸紳增修親爲評訂每月朔望宣講聖諭普及三十六所慮里民蠢愚未能洞悉諭意復逐條手輯註解刷印成書務使家喻戶曉以化民成俗方諸古代循良何多讓焉

臨縣志

卷十八 錄名宦

五

楊飛熊江南山陽進士康熙五十一年蒞臨見複崗崇嶺時憂曠乾創區田以粒生民至書院義學荒廢已久公捐俸親課甲午丁酉登賢書者七人前此未有也臨苦負載不善轉蓬之制乃開導車路使脂轄之利溥攝篆五載政修事舉爰輯舊志而增補之計自康熙戊戌縣志付梓之後至今民國六年丁巳二百年間土地人民政事所恃以徵文考獻者幸有前志存焉繼往開來厥功偉矣

張世培字念注孟縣人康熙五十二年由貢生任教諭每進諸生而訓之曰學校爲國家之根本師儒乃人民之命脈本固者國斯強脈和者人乃壽誘掖獎勸藹然父子之親同時邑令楊渭翁亦講求實學重振書院由是士風丕變掇巍科者有人登仕

籍者有人邑人懷公之德勒貞珉以誌不忘

杜庭珠浙江秀水人以廕生分藜內庭八年謁選授臨縣知縣康熙六十年蒞任時年穀不登流亡載道公設粥賑濟俾飢者得食逃者得歸民皆安之若素省撫承詔遣員賚帑金放賑歸言山西邑宰清廉愛民者以臨縣杜令爲最又崇學校勸農桑政簡刑清民無冤獄而革私派一事尤加詳審召父杜母寧是過耶

嚴遂成字海珊浙江烏程進士雍正六年蒞臨以臨山秀泉甘人文蔚起科甲聯繇而縣試生童寥寥乏人因查科歲二考卷費向有定額自惡胥壟斷把持正費之外復加私派察知其弊與兩儒學會商計紙費工本酌定卷價餘外不准私科嗣後人數

臨縣志

卷十八 錄名宦

六

倍增每試至六百餘名自壬子迄乙丑甫週一甲四舉於鄉兩登甲榜其奏疏著作刊有成書兼工詩律書法均足爲世楷模霍作明字垣梧廣東三水人雍正癸丑以進士知臨縣事慈惠廉明恩威並用生聚教誨常愧不及詎同父子家人適歲饑遍歷山嶠籍其貧者賑恤之時方亢旱蓬首跣足跪烈日中禱雨甘霖隨注城南五里茶亭公捐俸所建也旅人往來解煩渴庇風雨去任後民即於其亭祀之因名曰霍茶亭迄今過斯地者猶頌甘棠遺愛云

丁宗懋字謙字湖南醴泉人乾隆二十七年由舉人知臨縣事臨城東距湫河湫水滙激西射與城嶮非築堤以護之城不克保自明嘉靖兵備副使趙公伐石爲堰後屢修屢圯萬曆八年知

縣陳舜道重脩較爲完固恃以無恐者數十年明季兵燹相仍遺蹟遂盡付馮夷越清雍正壬子水暴至延及城內居民蕩析石大中丞發公款三千金築而新之從東門而南延袤一百三十丈俱砌石爲隄無何歲月寢深根掃剝落縫裂罅穿難與持久其迤北一帶水勢益蹙郡伯張公會加補苴疊亂石而糝以灰沙未幾亦隨漉漫壬午春公巡視城垣喟然歎曰欲衛民莫先完城欲完城莫先修隄顧猶以未信而勞弗敢倉猝舉事越明年乃與邑之紳士里老議詢謀僉同量力捐輸不徵而集方春經始徂秋告竣庀石蟠基惟深且固編縫則綴以鐵錠層累則貫以鐵管蓋歷稽前代興廢之跡而法益加密焉先是築隄之時人之議之者或曰水之爲城患者以不由東山崖下故道

行耳宜鑿渠以引之或又曰城以北爲趙家崖崖踣而水乃直薄城下宜墩於崖以捍之公曰不然余觀湫水漲溢奔沙徙岸水石俱下鑿未息肩淤不旋踵若趙家崖踞其上游適抵最衝挾登石之功以禦撼山之勢是螳臂而當車也何足與洪濤爭怒哉因扼隄之中權更築湫川煙雨臺狀如偃月與隄相抱以避趙家崖之衝水勢至此得稍停泊又若迴旣倒之狂瀾以障而東之者登臺南望則石大中丞之遺澤猶新其北則公所增築直抵城隅而止又作亭於臺上顏曰順成志喜也隄工旣竣至乾隆三十年詔天下有司相視城垣圯者脩之殘闕者補之准動用公帑以爲一勞永逸之計公承命揆度周遭完舊之功半新建之功亦半估費盈數萬乃省之又省約費二萬六千兩

有奇清制工在萬兩以上者例得委員分脩因即其段落析而爲三自東南隅以至於西屬汾陽令朱濬任之自東北隅以至於西屬孝義令王椿任之其正東一面瀕近湫河最扼險要則公董其成焉顧脩城難脩城而在臨縣爲尤難臨城依山傍水東湫河西鳳山程工匪易公承乏其間與縣尉吳潢約以丙戌暮春筮吉丁亥九月告成竭力殫心費省功倍始克底於完固縣治學宮迤南舊皆居民房舍路由東旁門入公捐廉置李姓常姓等宅若干間撤而去之開學宮向明之路方擬構先師牌樓以崇觀瞻引牛澗水作外泮池尋以有事城工未遑就緒生平工詩能文詩詞尤爲超妙茲不備載姑錄登東城樓留別吳尉七絕二首以見梗概

詩云高樓百尺俯重闔半枕山崗半水濱遲我歸期今五載自注云予自丙戌

臨縣志

卷十八錄名宦

八

與吳君有城工之役迄庚寅始得陳情歸侍護持還付未歸人垂柳依依欲別人葉含朝雨淚痕新叮嚀莫使輕攀折留傍孤城迓早春自注云隄柳成行皆予與吳君所手植者

吳潢浙江會稽人乾隆甲申春任臨尉精明強幹助縣正興利除害有德於臨民者不少歲乙酉奉太守俞公命補脩城垣兼及護城石堤前令丁公後令趙公皆委之督率工役公朝夕從事不畏寒暑不避風雨捐廉五十兩以助工費由乙酉以迄壬辰七易星霜莫敢違息城工告竣公力有足多者

呂公滋字碩亭中州人乾隆三十八年由進士蒞任甫下車見衙署荒蕪堂廡雖存而欹斜欲傾大堂尤甚東西房屋俱傾圮役吏悉寄寓廛肆中出入傳呼殊費周折三堂後益湫隘不可居公曰破壞至此非修輯不可民力不贍損下不如損上因稟請

上憲捐養廉銀九百八十餘兩舉內外房舍一切更新之五閱月而告成公私無不稱便又曰人材之興首在教育教育之責端賴師儒臨民樸而且勤熙雍之間科甲蟬聯賢良輩出今鳳山書院實與兩庠學相表裏前知縣莫公脩建之更置學田若干畝亦僅餘堂齋基址田租湮沒無從考核廢墜八十餘年鞠爲茂草殊堪浩歎因復捐俸補葺延堂兄寸田先生暫主講席招諸生童肄業其中晨夕講授由是士知鼓勵風氣蒸蒸日上焉

毛棣園江寧人嘉慶三年由進士知臨縣清介正直慈良愛民臨俗健訟公以嚴濟寬囂風漸革時白蓮教餘孽生變奉飭查禁遂攻訐成風民有戒葷吃齋誦說佛經者誣告株連橫加拘桎

公廉得其冤悉予寬釋保全良善民賴以安歲時伏臘多有焚香致祝者

趙廷澍字雨蒼陝西長安人由舉人大挑嘉慶二十四年蒞臨方是時奉飭脩理文廟規模粗具公與兩學師商請邑中熱心公益勤慎耐勞者武生秦光清監生高時泰延壽昌等分段監督日必親臨凡七易星霜功始告竣殿閣廊廡戟門泮池以及忠孝節義等祠櫺星門闕咸備又增明倫堂敬一亭齋房公所兩學公署堂舍庠序謹孝弟申胥是賴焉

趙輝璧字子穀雲南進士道光十七年蒞臨丰標俊逸品格清超淹通經史尤工書法崇儒重學撫字勤勞由是民殷物阜治臻平康賦五言四章以寄志

詩云經世無長策家居亦素餐只緣懷濟物不敢薄微官歲月消磨易關

河跋涉難鄉雲八千里迥首路漫漫此邦古烏突控馭晉西陲草
沒劉淵碣雲寒石勒祠餘風殊蒼莽舊俗尙陵夷勿恃徒敲撲須
令識父師好鬪矜蠻蠲糾朋競角牙汝曹成習慣余意甚咨嗟切
切勤相語蚩蚩聽勿譁儻能容我懶山縣好栽花無才甘受牧是
處等牛羊地若論肥瘠人何別士商關情憐公撫臨數載爲政一
鵠瘦僻壤藉鳩藏撫字吾何力民勞望小康

黃廷範字子山江蘇甘泉人道光二十一年冬由進士蒞臨廉勤
有吏才民以訟至判決如流其嚴懲土豪矜恤孤苦尤爲民所
畏服積口鎮爲河路要衝素多盜設法捕緝商旅獲安縣多川
廣客民來集連枝山以墾田爲業歲少歉輒不靖悉按所居編
入保甲孤村弱戶藉以無恐居三年政教大行嗣以石碑疑案
罣誤解任士民奔走訴大府乞保留時巡撫原情特允會以疾
卒合邑傷之

臨縣志

卷十八

錄名宦

十

聶文炳字虎臣道光二十八年由副貢知臨縣事慈祥愷悌盡心
教養民以訟至必反覆開導非十分梗頑未嘗輕下一笞而是
非曲直鑑空衡平決不模稜兩可省徭革弊寬免一切科歛滑
吏衙蠹舞文弄法者畏其清介不敢敲詐時奉飭編丁審戶所
有胥役册卷公費捐俸清繳未嘗攤派擾民惠政所被翕然悅
服陞任去士庶祖餞滿道邑人劉湫陽賦詩贈之

有云兩袖清風秋氣爽一

鞭古道夕陽紅

至今猶傳頌不置

劉邦俊字邁千寧武人咸豐丙辰由明經任臨訓導精明爽邁凡
教官應盡之職靡不次第脩舉正學規嚴月課誘掖獎勵之餘
復假形家者言歆動士氣臨自嘉慶戊辰科至咸豐丙辰天荒
者四十九年公謂奎星宜居文廟巽方不應在湫河之東

城東

村舊建奎光樓因另建奎樓於樞星門之左甫及落成而高公光先已登戊午科賢書既而重新文廟補脩文塔新建文昌先代祠從此文運大啓三科三捷尤足多者當同治初元甘回擾亂陝北河西賊匪四出臨當其衝上憲飭辦磧口河防時知縣苦籌防無餉公親赴各鄉將三十六所之民聯成保甲以紳矜充團甲長造冊申報不費不擾全邑獲安在臨十年士民感戴歌詩頌之去任時刻有歸田錄

白賡棫字子俊直隸通州人同治十二年知縣事明敏練達事至立決期年政平訟理值光緒丁戊大侵審核戶籍嚴治盜劫集紳富多方籌捐以次賑恤踰年民困漸蘇因賑務至磧口鎮積勞成疾卒於道中宦清囊空不克歸櫬邑人哀之卜地於城東

臨縣志

卷十八

錄名宦

十一

五里甘泉村營葬歲時祀焉

左兆熊字夢卿直隸樂亭人以舉人大挑由陽城調署臨縣光緒四年適承賑事未竣草笠單騎下鄉勘查審戶口撫飢寒蒿日蒼赤務使實惠均霑又逢夏旱步上紫金山禱雨有文記之甘霖隨降民慶有秋由是減役緩刑創辦書院親披課卷以振文風養教兼興士民歌來暮焉治臨年餘去任合邑感德作輿頌以誌不忘

胡鑑斗字星輔河南舞陽進士光緒七年蒞臨值大侵之後念土荒人稀省刑薄歛息事寧人是秋豐收親騎下鄉勸諭各村設義倉以備不虞書院觀風見士多可造訝曰此地不發甲科將近百年或是風水之咎因於城西北隅鳳嶺之巔創建文峯塔

是時書院已延請山長公餘必親詣講課誘掖獎勵不憚煩勞每逢賓興必筵燕豐備以事鼓勵士林爭自濯摩數年之間領鄉薦者七人捷南宮者二人邑人士以扶持文運多之公曰微臨多才吾術不售矣臨自丁戊後官斯土者僦居民房屢議脩復衙署每以勞動爲戒一日集公正邑紳令會籌不煩不擾之法邑紳吳積德前曰一縣之主居非其所失向明出治之體以合邑三十六所計同力經營亦易事耳惟假手胥役民不贊成公聽其議曰君端人也敢以相煩衆亦交推籌畫一切議定按所分攤經費每所不過三十餘千分段經修數月功告竣甲申乙酉之交豺狼爲害鄉閭驚恐公懸賞捕獵合境賴安前後十餘年間三來三去來則竹馬歡迎去則攀轅臥轍皆公實心實

政有以致之云

孔繁昌字仲光貴州貴筑人由翰林散館分發臨縣光緒十八年履任時以清慎勤自勵與民相見以天臨書院自前知縣左兆熊胡鑑斗先後籌辦十餘年間迄無成局公到任將民捐之已書未收或收而未齊並應捐未捐者一律結清書院舊址脩整一新講堂齋舍咸備將學署舊存之經史子集移置書院又捐置應用之書十數種酌定山長脩金生童膏獎手擬講課章程二十四條勒石示後簿書之暇親詣講課評定甲乙士習蒸蒸日上二十六年夏拳匪事起出示嚴禁後雖迫於巡撫毓賢亂命禁不稍弛並未殘傷異族是年秋荒旱成災亂機已兆縣城失脩百餘年守衛無恃召集闔邑紳富商議補脩以工代賑公

誠信素孚一呼四應旬月之間書捐一萬七千餘串即時興工
選派城鄉紳耆分段經脩脩城記詳載營建考一時四鄉飢民咸來趨事
是年冬親查四鄉之極貧次貧戶分別賑濟又於南關設粥廠
遠近就食者數百人日必親往嘗飯計口受食務令實惠均霑
先是八月間聯軍進京清帝西走嗣因晉撫毓賢屠戮教士教
民百七十餘名十月初聯軍逼關允償賠款一百七十萬道府
州縣罷誤落職者數十人公無辜牽連邑人冤之後經昭雪開
復原官改授河南閩鄉縣屢列卓異民國初給予五等嘉禾章

謹案志例生人不錄孔公現官河南國已改制官已隔省故錄之

